

## XI. IGANDEA URTEAN ZEHAR (A)

### Otoitza

Jainko Jauna, Zugan itxaroten dutenen indarra,  
entzun bihotz onez gure otoitza;  
eta Zu gabe gizakiaren ahuleriak ezer ez baitezake,  
emaguzu beti zure graziaren laguntza;  
zure aginduak betez,  
Zuretzat atsegingarri izan gaitezen gogoz eta egitez.  
Zure Seme Jesu Kristo.

I. IRAKURGAIA: Ex 19, 2-6a

*Zuek apaiz herri eta herri santu izango zarete Niretzat.*

Exodo liburutik

Egun haietan, israeldarrak Sinaiko basamortura iritsi ondoren, han ipini zituzten oihal txabolak mendiaren aurrez aurre.

Moises Jaungoikoarengana igo zen. Eta Jaunak menditik dei egin, eta esan zion: «Honela hitzegingo diozu Jakoberen etxeari, eta hau hotsegingo israeldarrei: "Ikusi duzue egiptoarrei egin diedana, eta zuek arrano hegaletan eraman zaituztedala eta Niregana erakarri.

Orain, beraz, benetan entzuten baduzue nire hitza, eta nire elkargoa gordetzen, zuek izango zarete nire ondasun berezia, herri guztien artean, nirea baita lur osoa; zuek, berriz, apaiz herri eta herri santu izango zarete Niretzat"».

ERANTZUN SALMOA: Sal 99, 2. 3. 5

**R/. Jaunaren herri gara eta Haren larreko artalde.**

Lurtar guztiok, egin irrintzi Jaunari,  
Jaunari zerbitzu alai egiozue,  
Haren aurrera pozez oihuka sar zaitezte. R/.

Jakizue Jauna dela Jainko,  
Berak egin gaitu, Berarenak gara,  
Beraren herri eta larreko artalde. R/.

Onbera baita Jauna,  
Haren maitasuna betidaino,  
Haren leialtasuna mendeen mendeetaraino. R/.

II. IRAKURGAIA: Erm 5, 6-11

*Jainkoarekin adiskidetuak izan baginen,  
Haren Se*

*are gehiago salbatuak izango gara Haren biziari esker.*

San Paulo Apostoluak Erromatarrei

Senideok: Oraindik indar gabe geundela, Kristo, bere orduan, gaiztoen alde hil zen. Nekez hil daiteke norbait gizaki zuzen baten alde; gizaki on baten alde, baliteke norbaitek hil nahi izatea. Baina, honetan erakusten du Jaungoikoak guretzat duen maitasuna: gu bekatari ginelarik, Kristo gure alde hil baitzen.

Beraz, orain Haren odolaz zuzentasuna iritsi dugunez gero, are gehiago salbatuko gara haserretik Berari esker.

Etsai ginelarik, Jainkoarekin adiskidetuak izan baginen, Haren Semearen heriotzari esker, are gehiago salbatuak izango gara Haren biziari esker, adiskidetuak gaudelarik. Gehiago oraindik: harrotu ere egiten gara Jaungoikoarengan Jesu Kristo gure Jaunaren bidez; orain, Beronen bidez, Jainkoarekin adiskiditza iritsi dugu eta.

EBANJELIOA: Mt 9, 36–10, 8

**Aleluia:** Mk 1, 15b

R/. Aleluia.

V/. Hurbil da Jaungoikoaren erreinua;  
bihotz-berri zaitezte eta sinets berri ona. R/.

*Jesusek bere hamabi ikasleei dei egin zien  
eta bidali egin zituen.*

Jesu Kristoren Ebanjelioa San Mateoren liburutik

Aldi hartan, herriz herri eta auzorik auzo zebilen Jesus, haien sinagogetan erakusten, erreinuko berri ona hotsegiten, eta gaitz eta min guztiak sendatzen. Gizataldeak ikustean, erruki izan zituen, nekaturik eta lur jota baitzeuden, artzainik gabeko ardiak bezala.

Eta orduan ikasleei esan zien: «Uzta ugaria da; baina langileak gutxi. Egin, beraz, otoitz uzta jabeari, bidal ditzala langileak bere uztara».

Jesusek bere hamabi ikasleei dei egin eta ahalmena eman zien espiritu likitsak uxatzeko, eta gaitz eta min guztiak sendatzeko.

Hamabi apostoluen izenak hauek dira: aurrena Simon, Pedro deritzana, eta Andres honen anaia; Santiago Zebedeorena eta Jon honen anaia; Felipe eta Bartolome, Tomas eta Mateo zerga biltzailea, Santiago Alfeorena eta Tadeo; Simon kanaandarra eta Judas Iskariote, saldu zuena bera.

Hamabi hauek bidali zituen Jesusek, ohar hauek eginez: «Ez joan jentil lurretara, ez sartu Samariako herrietan; baizik eta zoazte, galduta dabiltzan Israel etxeko ardiatara. Eta bidean zoaztela, hotsegin ezazue, hurbil dela zeruetako erreinua. Senda itzazue gaixoak, biztu hilak, garbitu lepradunak, uxatu deabruak; hutsean hartu duzue, eman hutsean».

### **Oparigaien gainekoa**

Jainko Jauna, orain eskaintzen dizkizugun dohainetan aurkitzen ditugu bizitza honetarako janaria eta bizi berriaren sakramentua; egizu, gure gorputz-arimak ez daitezela gerta inoiz ere

hauen laguntzarik gabe.  
Jesu Kristo.

### **Jaunartze ondorengoa**

Jaunartze honek, Jauna,  
fededunak Zurekin bat direla adierazten du;  
ekar dezala  
zure Elizan guztiok elkarrekin bat egitea.  
Jesu Kristo.